



## Komunikadu Imprensa Munisípiu Covalima

### **Asuntu Tráfiku Umanu nu'udar informasaun foun ba comunidade Suku Beiseuc - Munisípiu Covalima**

JSMP kontinua halo treinamentu kona-ba Tráfiku Umanu no Violénsia Bazeia ba Jéneru iha Suku Beiseuc, Posto Administrativu Tilomar, Munisípiu Covalima durante loron haat (4), hahú hosi 29 Agostu to'o 01 Setembru 2023.

Treinamentu ne'e oficialmente loke husi Xefe Suku Beiseuc, Sr. Saturnino C. Maia no representante Diretora Ezekutiva JSMP, Sra. Flora Soriano Menezes nu'udar Koordinadora Unidade Peskizadór legál no Unidade Advokasia no Treinamentu.

“Objetivu husi treinamentu ne'e atu kapasita no hasa'e koñesimentu mobilizadór no lider comunidade sira nian kona-ba krime tráfiku umanu no violénsia bazeia ba jéneru no oinsá atu halo prevensaun no ajuda vítima sira bainhira akontese krime sira ne'e iha comunidade nia leet. JSMP identifika no hili Suku Beiseuc hodi halo treinamentu ne'e, tanba hanesan suku ida ne'ebé baliza ho Indonézia no sai fatin ba movimentu tama-sai husi sidadaun nasaun rua, Indonézia no Timor-Leste,” dehan Sra. Flora Soriano Menezes, Koordinadora Unidade Peskizadór legál no Unidade Advokasia no Treinamentu.

Xefe Suku Beiseuc iha ninia intervensaun, agradese tebes ba JSMP tanba bele hili no konsidera sira-nia suku hodi halo treinamentu kona-ba krime trafiku umanu no ida ne'e foin primeiravés akontese iha sira ninia suku. Nia konsidera informasaun sira ne'e importante tebes, tanba dala ruma ita hela iha área fronteira, maluk balu husi Indonézia mai bosok ita atu serbisu iha Indonézia ho saláriu ne'ebé boot, maibé no fin to'o iha ne'ebá halo fali serbisu seluk ne'ebé la tuir konkordánsia no fó saláriu ne'ebé ki'ik.

Nune'e xefe suku husu ba partisipante sira atu partisipa ho efetivu no kompletu durante loron haat ne'e ba atu nune'e bele hatene matéria ne'ebé fó husi fasilidadór/treinador/a sira no aban-bainrua bele fahe fali informasaun sira ne'e ba maluk seluk ne'ebé la hetan oportunidade.

Durante treinamentu ne'e, partisipante sira hato'o sira nia preokupasaun sira hanesan sira ta'uk atu apresenta keixa ba kazu trafíku umanu no violénsia bazeia ba jéneru tanba bele kria fali relasaun ladi'ak entre sira ho suspeitu no ka vítima sira. Kestaun seluk sira mós preokupa kona-ba iha sira nia suku comunidade balun apresenta ona keixa ba kazu oho malu maibé liu ona tinan lima (5) comunidade la hetan progresu informasaun ruma husi kazu ne'e.

Hatan ba preokupasaun partisipante sira nian, ba asuntu ta'uk atu apresenta keixa iha kazu violénsia doméstika no kazu trafíku umanu, JSMP responde katak comunidade la bele ta'uk atu apresenta keixa tanba Timor Leste iha Lei Protesaun Testemuña ne'ebé sei fó protesau ba testemuña sira hodi asegura katak polísia ka prokuradór ne'ebé simu sira nia keixa sei la fó sai keixa na'in nia identidade ba ema seluk no karik polísia no prokuradór presiza atu rona testemuña nia deklarasaun bele husu atu rona ketak no la presiza prezensa suspeitu ka vítima nian. Nune'e mós bainhira iha prosesu julgamentu, bele hala'o liuhusi telekonferénsia. subar testemuña ka vítima sira nia imajen no lian.

Kestaun kona-ba kazu ne'ebé comunidade sira apresenta keixa kle'ur ona, maibé comunidade sira la hetan informasaun ba sira nia kazu, JSMP hatan katak parte sira (vítima ka suspeitu) ka família sira bele ba konfirma iha Ministériu Públiku hodi husu tuir andamentu husi kazu ne'e tanba iha kazu balun nia prosesu lori tempu kle'ur iha prosesu buka evidénsia ne'ebé depende ba komplisidade iha kazu no dalabarak akontese mós katak kazu balun ninia prosesu tarde tanba parte sira mak ladun kolabora di'ak ho tribunál ezemplu bainhira tribunál notifika parte sira atu mai julgamentu, maibé parte sira editál nune'e prejudika prosesu balun lori tempu kle'ur.

Treinamentu loron haat (4) ne'e insera oficialmente husi Xefe Suku Beiseuc, Sr. Saturnino C. Maia no representante Diretora Ezekutiva JSMP Sra. Flora Soriano Menezes nu'udar Coordenadora Unidade Peskizadór legál no Unidade Advokasia no Treinamentu.

Iha enseramentu ne'e, Xefe Suku agradese tebes ba JSMP tanba matéria sira ne'ebé mak hetan iha treinamentu ne'e importante no esensiál tebes ba nia comunidade liuliu matéria kona-ba trafíku umanu tanba Suku Beiseuc iha kedan área fronteira ne'ebé ho risku krime hirak ne'e bele akontese iha kualkér tempu. Alende ne'e, xefe suku rekomenda mós ba JSMP atu iha futuru bele fó mós treinamentu kona-ba droga, tanba akontese katak iha comunidade ne'ebé envolve iha futu manu abitua sosa aimoruk ho tipu hanesan droga iha Atambua, Indonezia hodi fó ba sira nia manu hodi bele forte entaun nia preokupa ida ne'e bele utiliza sala husi nia comunidade sira.

Partisipante sira ne'ebé partisipa iha treinamentu ne'e mai husi estrutura suku hanesan xefe suku, xefe aldeia sira, delegadu/a, juventude sira, lider relijiaun ida husi relijiaun katóliku no comunidade sira husi Suku Beiseuc ho total hamutuk ema na'in 31, ne'ebé kompostu husi feto 16 no mane 15 no iha treinamentu sesaun ikus partisipa mós husi Komandate VPU Munisípiu Covalima.

Treinamentu ne'e realiza ho apoiu finanseiru husi Governu Timor-Leste, Ministériu Interiór ne'ebé diretamente jere husi ajénsia Nasoins Unidas UN Women.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)